

THE HEHEURA A API

TIUNU 1940

TE MAU API NO TE RAAU ORA
TE AHURU MA PITI O TE API

TE tumu rahi o te tere o te Mesia ra o te faaoraraa
ia i te mea tei moe. Aita te reira ohipa i oti a tau-
tau ai Oia i nia i te satauro. Ta'na parau hopea i nia i te sa-
tauro, oia hoi, *Ua oti*, no to'na ia mauiviraa no te hara e to
utu'a o te pohe, ta'na ia ohipa i te tino nei. Mai ta tatou i
ite a'enei, ua rave noa Oia i ta'na ohipa faaoraraa i rapae i
te tino, ua roto i te a'oraa i te evanelia i te feia i pohe ra.
I muri a'e i To'na tia-faahou-raa ua pinepine to'na farerei-
raa i ta'na mau pipi e ua haapii atu oia i te parau no te faa-
oraraa e na tono atu ia ratou i te mau fenua atoa ia rave-
noa-hia â te ohipa i haamatahia e ana. Ua haapii atu oia i te
tahi atu â mau fenua e ua faarohia to'na reo e te tahi mau
mamoe ê atu, tei ore i parahi i roto i te nânâ i Kanaana, ia
tia i na opu tino ahuru o Iseraela i moe ra e te feia te ore e
taeahia e ta'na mau Aposetolo ati Iuda ra, ia faaroo i te pa-
rau oaoa no te faaoraraa. Te reira mau parau, tei ore roa i
faaite-papu-hia i roto i te Bibilia, ua faaite-papu-hia ia i ro-
to i te Buka a Moromona. I muri a'e i to'na tia-faahou-raa,
mai ta'na i parau atu, ua haere oia e faanehenehe i te hoê
parahiraa no ta'na mau pipi ia tia ia ratou, ia faarue ratou
i teie nei ao, ia parahi i pihaiho ia'na.

E tufaa nainai noa iho te reira no te ohipa rahi no te faa-oraraa. Te mau mea atoa tei moe na roto ia Adamu, ia itea-faahou-hia ia na roto i te Mesia ra. Na roto i te raveraa i te hara ua tae mai **te pohe i roto i teie nei** ao e ua noaa ia Sata-ne te mana. Ua rurutaina te fenua i raro a'e i te reira a-natema, e aita atura o Edene i unauna faahou i nia i te fenua. Ua rave ê-hia te raau o te ora, tupu ihora te tataramoa e te motuu e te mau aihere iino ei mono i te mau tiare e te mau

maa o te paradaiso. Hunahia'tura te ite i te Atua i te mata o te taata nei e riro atura te oto e te rohirohi ei tufaa na te taata pohe noa. Tupu atura te inoino i rotopu i te taata e te mau animala e i atura te niho o te ophi i te mea taero roa e te taehae i roto i te mau i'a o te tai. Vai atura te inoino i rotopu i te mau mea atoa, e ori haere noa'tura te pohe i nia i te ao nei tei tairihia.

Eaha ia te mea i moe i reira? Te tahuti ore o te taata; te raau o te ora, te amuiraa ia Iehova; te hoaraa i te mau melahi; te mâ o te paradaiso; te mana o te taata i nia i te mau mea atoa i raro a'e ia'na; te tiamâraa i te mau faahemaraa a Satane; te oreraa o te ohipa e te mauini atoa; to te ao nei auraa i te mau mea no te vahi teitei a'e.

E haere noa te ohipa a te Mesia e tae noa'tu ua hope teie mau mea atoa i te faaho'ihia mai. Ia tamâhia teie nei ao i to'na viivii e tia'i, e ia tahuhia to'na mau materia e te auahi e tae noa'tu ia tamâhia i te mau ino atoa. Ia tiahibia Satane e ta'na mau melahi e tia'i. Ia hotu faahou te ô Edene mai te matamua. Ia faaea te liona e te pinia mamoe i te vahi hoê. Ia tupu te suke e te roti i te vahi e tupu atoa'i te matie atoa. Ia faatiahia i nia te utuafare atoa o Adamu. Ia iritihia te paruru e vai nei i ropu i te ao e te ra'i. Ia tapoi te ite o te Atua i te fenua nei mai te pape e tapoi nei i te apoo, e ia tuuhia mai i nia i te mau tino atoa te varua o te ora e te hau e te maramarama e te oaoa.

E ere te taeraa mai o te mahana rahi o te mileniuma, tei itehia e te mau peropheta mo'a hou te tunu o te ao nei, e te parahimaa o te taata e te fenua nei ma te hau, i te faahopearaa i te ohipa hanahana a te Mesia. Eiaha ana'e ra ia faatiahia to'na basileia i na otia e maha o te ao nei, ia tae ra To'na mana faaora i te mau varua atoa o to tatou nunaa tei moe i te vahi o tei faahapahia ra.

Ua faataahia te hoê haavaraa parau-tia no te taatoaraa. E faautu'ahia te feia tei patoi i te evanelia e te feia tei au i te tairiraa e rave rahi, e farii ia ratou i ta ratou tufaa. E hurihia te feia hara i roto ia hade e te mau nunaa tei haamoe i te Atua. E aufau iho â te taata tataihoê i ta'na iho utu'a e hope roa a'e. E faautu'a iho â te parau-tia, mai te tamaruhia e te aroha, *Te mau taata atoa mai te au i ta'na ohipa.* Te vai noa nei te faautu'araa, oia hoi, te faautu'araa mure

ore.
tou i
faaut
te fa
na re
anei
ture

A
tia ia
i to'r
Mesia
e hac
hi ha

E
te ta
ruur
raa i
to ma
te ma
mai t
na tin
noaa
a mu
te m
uo te
te At

Ar
i te A
e faa
orahi
farii
mona
o te
te ma
noa't
tei m
Varu
ratou
roto
faatia
hara

ore. Area te mau feia o te farii i te mauini ra, e farii ia ratou i ta ratou iho tufaa tia. Eaha, e mea tia anei ia hoê a'e faautu'araa to te taata tei haapao ore i te mahana Sabati, to te faaturi e te eiâ, to te taata inu ava e te taata tuhi noa? E na reira anei te mau haavaraa a te taata nei? Ua hau atu anei to te taata parau-tia i to te Atua? Ia oti te titauraa a te ture parau-tia ra, aita anei te hoê vahi e toe no te aroha?

A vai noa'i te hoê varua no teie nunaa, tei hinaaro e tei tia ia farii e ia haapao i te mau ture no te faaoraraa, noa'tu i to'na huru e te vahi e itehia'i oia, aita â ia te ohipa a te Mesia i oti i reira e tae noa'tu e afaihia mai oia mai te pohe e hade, e ia tuuhia i nia i te e'a o te haereraa i mua, i te vahi hanahana e au ia'na e te taviniraa i te Atua.

E faaauhia te utu'a i nia i te mau ino i ravehia, e e ite noa te taata hara i te huru o te reira. Ia pee râ te utu'a e ia mau-ruru te ture, ia noaa mai te faaroo na roto i te mau haapii-raa i noaa mai; ia haere mai tana varua ra ma te oaoa no roto mai i to'na faautu'araa mure ore, ma te ineine i te farii i te mau ture tei patoihia i te matamua; e itehia ia te hoê mea mai te moe ra. Eita roa te hanahana o te îraa o te hanahana tiretiera, e te parahiraa i pihaiiho i te Atua e te Arenio e noaa i te reira varua tei faaorahia, aita ra i haamaitahia, e a muri noa'tu. E ere te mana no te faarahiraa, tei reira hoi te mau basileia e te mau korona no te hanahana faito ore, no te reira huru tino tei hurihia i hade e tei farii i te riri o te Atua no te tau i faataahia e te haavaraa mure ore ra.

Area râ o Iesu, tei faatahinuhia, e ta'na mau faaora tei mau i te Autahu'araa mai te au i to Melehizedeka, e imi ratou e e faaora ratou atoa i te mau varua atoa e tae noa'tu ia faa-orahia te tia ia faaorahia. O ratou ana'e tei ite i te ture, tei farii i te maramarama o te parau mau, tei tamata i te mau monamona o te varua, tei tamahanahanahia i roto i te hihi o te hanahana o te ra'i, tei fafau e, e tavini ratou i te Arii o te mau arii e tei farii i te mana no te haereraa i mua e tae noa'tu i te hopea o te teiteiraa, e tei faarne i te parau mau e tei maiti i te ino ei mono i te maitai, e tei faahahi ê atu i te Varua o te parau mau e te maramarama, e tei titau ia riro ratou iho ei ture na ratou iho, tei haaviivii i to ratou rima i roto i te toto hara ore, tei inu i te mau ravea a te ino ra, tei faatia te taparahiraahia o te Faaora o te ao nei, e i reira ua hara ratou i te Varua Maitai e riro atura ei tavini no Satane

e te mau tamarii o te pohe, o ratou te ore roa e noaa faahou te tatarahapa e e vai *Viivii noa*, e te ore roa e au no te hoê a'e o te mau hanahana i faataahia ra. E haere ratou e te diabololo, e ta'na mau melahi, i rapae, i roto i te poiri, i te vahi atea roa i te vahi te tahe ra te anavai o te ora, e tei reira te raau o te ora i te tupuraa. O ratou ana'e to te huaai o Adamu te ore roa e au faahou ia tatarahapa, no te mea no ratou ana'e te piti o te pohe e te poiri taotao e a muri noa'tu.

Ia oti te ohipa a te Mesia e ta'na mau arii e te mau tahu'a i roto i te Atua, e farii te feia mo'a no te mau tau atoa i te mau korona o te hanahana e ta ratou mau utu'a. E faarirohia ratou ei faatere i nia i te mau mea e rave rahi. I roto i te haapaoraa o te mure ore e tia ratou i roto i te utuafare o te ra'i e e riro te mau mea atoa ei tufaa na ratou. Aita ia e hopearaa na to ratou rahiraa. E mau ratou i te mau taviri no te mau mea i nia roa e te mau mea i raro roa, e e mana ratou i nia i te mau mea atoa, to te pae tino e to te pae varua. E amui ratou e te mau mea teitei a'e, e e hi'o ratou i te mata o te Atua Mure ore, e e parahi i mua i te Tamaiti hara ore ra. E riro ia te mau iui e te oto, te ati e te pohe ei haamana'oraa na ratou, e ei faito tia mau no to ratou oaoa mau. E i reira e vai ai te mure ore, ma te otia ore i mua i ratou ma ta ratou ohipa e to ratou oaoa e te ite e te hanahana mai te au i to te Atua Metua iho. O te hanahana tiretiera ia.

E rave rahi te ore e amuihia i rotopu i te mau Feia Mo'a a te Atua, area râ, ua farii i te evanelia i roto i te varua; te mau taata maitatai tei aratai ê-hia e te haavare a te taata, te pūpū tei ore i tia ia farii i te hanahana tiretiera e te pohe o te feia hara, e farii atoa ia ratou i ta ratou tufaa. Eita e noaa ia ratou te mau horoaraa no te haereraa i mua, e te mau ma na no te îraa o te teitei, e ô râ ratou i to ratou vahi parahiraara, o te hanahana atoa hoi. E noa'tu eita ratou e tae i te îraa o te Metua, e farerei ratou i te Tamaiti e to'na mau taturu i roto i te ao teretetiera, e e farii ratou i te mau oaoa rahi te ore e tia ia faaite te huru no to ratou hopea ore e te rahi. E farii ratou i te hanahana teretetiera.

E o ratou tei tuuhia i raro roa no ta ratou mau hara, te patoi i te evanelia a Iesu, tei hamani ino i te feia mo'a, te rave noa i te ino e tei rave i te mau huru faahaparaa atoa i area râ, aita i rave i te hara matara ore, e haere atoa ma

ratou i te tau mau a te F'atu ra, na roto i te toto o te Arenio e te raveraveraa o ta'na mau pīpī e to ratou iho tatarahapa e te hinaaro ia farii i te ture mo'a ra, e ô ratou i roto i te mau parahiraa hanahana e rave rahi tei reira te maramarama e te haereraa i mua, mai te au i to ratou huru e to ratou itoitō. Eita e tia ia ratou ia haere i rōto i te amuiraa o te Atua e ia farii atoa i te Tamaiti, e farii rā ratou i te raveraveraa o te mau ve'a no te teretetiera, e e noaa ia ratou te oaoa te ore roa e tia i te taata ia haroaroa. E tuu ratou i te tūri i mua ia Iesu Mesia e e tavini ratou i te Atua Metua, ma te rave i te ohipa e te oaoa ma te au i te mau mea teitei a'e. E farii ia ratou i te hanahana tiretia.

Inaha, e noaa i te mau taata atoa tei parahi i uia i te ao nei te faaoraraa, maori rā te puea iti tei taa ê roa i te mana no te faaoraraa. E te ao nei, tei riro ei parahiraa tamataraa no ratou, tei haapao i ta'na iho tura, e ho'i faahou ia oia i mua i te haamana'oraa a tei hamani ia'na. E pohe atoa oia mai te mau mea i tupu no roto mai ia'na. E faahuru-ê-hia rā oia e e tia faahou ia oia i roto i te hanahana tiretiera. Ua fanauhia oia i te pape, ia fanau-atoa-hia oia i te Varua. Ia tamāhia oia e te auahi i te mau mea tei haaviivii ia'na e ia faahopehia to'na mau maitai no to'na meloraa o te hui fetii o te mau ao te au no te fariiraa i tei hamani ia'na, e tere ia oia i to'na vahi mau i rotopu i te mau ao tei faaterehia e te tau tiretiera. I reira oia e anaana ai mai *te miti hi'o ra tei anoihia i te auahi* a parahi ai tei hoohia e te F'atu i nia ia'na e e haere mai te mau mea teitei no te mau ao tahito roa e farerei ia'na. E vai te ô o te Atua i reira; e faatere te ture o te ra'i i te mau vahi atoa e e arii o Iesu i nia ia'na; e tahe te pape o te ora no roto mai i to'na terono; te raau ora rā, e riro ia to'na mau rau ei raau faaora no te mau fenua atoa, e tupu ia oia i pihaiho i taua pape no te ra'i ra e e ho-roa-noa-hia to'na mau hotu i te mau taata atoa ia amu ratou e ia ora e a muri noa'tu. E pūpūhia te reira ao i haamaitaibia, e to'na mau taata tei faaorahia, i te Metua mure ore ei faaotiraa no te mau ohipa a te Mesia, e e riro te mau mea atoa ei taata no te Patereareha Rahi, te Faatere, te Mana Hope tei faaroohia e tei aurarohia e te mau ao hopea ore tei anaana mai te mau ofai anaana no to'na korona hopea ore!

*Papaiahia e C. W. Penrose, te hoê Aposetolo
Faauhia ei reo Tahiti e K. R. Stevens
Peresideni Misioni*

EDITORIALE

E MAU AROHA NO TE REVARAA

E ere o outou tei hinaaro mai ia'u; o vanu râ tei hinaaro atu ia outou, e ua haapao ia outou ia haere outou e ia hotu i te huero, ei huero vaiiho taiata, ia horoa mai te Metua ia outou i ta outou e ani ma to'u nei i'oa ia'na ra. Ioane 15:16.

O te huru ia o te haamaitairaa tei tuuhia mai i nia ia'u a tuu atu ai to tatou peropheta e to tatou Peresideni ra o Hebera J. Garanata i to'na rima i nia i to'u nei upoo a faataa'i oia ia'u ia riro ei peresideni i nia i teie nei misioni. Ua huru iti a'e i te piti o te matahihi to'u parahiraa i ô nei, e te tiaturi nei au e, ua faahotuhia taua hotu ra, i roto i te reira tau, na te Fatu, na roto i te ohipa e te mau tutavaraa a te mau orometua tei parahi i ô nei.

Teie ia ta matou ohipa i rotopu ia outou, oia hoi, ia poro haere i te evanelia a te Fatu ra o Iesu Mesia i te feia tei ini i te parau mau mai tei haapiihia e Iesu ibo; ia faatia i te mau amaa e ia haapao ia tere maitai ratou ra; e ia a'o e ia faaitoito i te mau feia mo'a e te mau melo ia tapea e ia haapao i te mau faaueraa e te mau ture a te Atua ra.

O outou te maramarama o teie nei ao, no te mea ua ho-roahia ia outou te evanelia mau a Iesu Mesia; e i teie nei râ, no to outou riroraa ei melo, e mea tia roa ia riro outou ei hi'oraa na to te ao nei, no te mea o outou taua hotu i parau-hia e te Fatu ra.

Ua tae mai te faaueraa ia ho'i matou i Utaha i te ava'e Tinnu. Ua oaoa matou i te farereiraa e te iteraa ia outou; e i te iteraa i to outou faaroo e to outou tapearaa papu i te evanelia a te Fatu. No reira, te ani atu nei au i te Metua, ia tau mau noa â Oia i te ninii mai i ta'na mau haamaitairaa i nia ia outou, to outou mau fenua e ta outou atoa mau ohipa maitai, ia tia ia outou ia farii i te reira mau haamaitairaa maitai te an i to outou faaroora e te haapaora i te mau ture e te mau faaueraa a te Atua.

E tae mai paha te peresideni api, Tihoni Tanona, i roto i te ava'e Setepa ma te apeeia mai e ta'na vahine. Mai teie nei e tae noa'tu i te reira tau na Teina orometua, te papai parau o te misioni, e haapao e e faatere i te mau ohipa atoa o te misioni nei; no reira, e tia ia ia outou ia papai mai ia'na no te faaiteraa mai i te huru o to outou mau amaa e te mau ohipa i roto ra.

E i teie nei, ia vai te hau e te here o Iesu Mesia i nia ia outou.

Setefano, Peresideni Misioni.

TE PARAU AUTAHU'ARAA

No te Ava'e TIUNU

TE MAU TAATA TUIROO O TE BIBILIA

E MAU UIRAA

1. O vai teie taata? 2. Eaha to'na toro'a? 3. Eaha te huru o to'na maitiraahia? 4. I hea ta'na ohipa i ravehia'i? 5. Eaha te ohipa i oti ia'na? 6. Ua mauruuru anei te mau taata ia'na? 7. Ua mauruuru anei te Atua ia'na? 8. E manuia anei tatou ia pee tatou ia'na? A tara mai.

Tiurai 7. IAKOBO â AREPHAIA. Te Ohipa 1:13; Mataio 10; Mareko 3:14-20; Luka 6:13-16.

Tiurai 14. SIMONA â ZELOTA. Te Ohipa 1:13; Mataio 10; Mareko 3:14-20; Luka 6:13-16.

Tiurai 21. IUDA, te taeae o IAKOBO. Te Ohipa 1:13; Luka 6:16; Ioane 14:22.

Tiurai 28. E haapii atu i te parau no na Haapii Hahaere no te ava'e i mua, mai tei papahia i roto i te ve'a no Tiurai.

Na Te Mau Maapii

Mahaere na te Mau Utuafare

E ore e tia i te taata ia faaorahia a vai ai oia i roto i te pōiri, te na reira maira te hoê o to tatou mau peropheta no te mau mahana hopea nei.

Inaha, e tamarii rii outou e e ore e tia ia outou ia farii i te mau mea atoa i teie nei; ia tupu outou i roto i te aroha e i roto i te ite i te parau mau e tia'i. B. F. 50:40.

Te vai nei ia tatou te Bibilia e te Buka a Moromona. Ehia râ taata tei tai'o pinepine i taua na buka ra? E faufaa-hia anei tatou mai te mea e, te vai nei na buka i roto i to tatou fare, aita râ i tai'ohia?

E i te mea e, aita to te taatoaraa e faaroo, a imi iteito noa outou e a haapii hoi te tahi i te tahi i te mau parau no te paari; oia ia, a imi outou i roto i te mau buka tei hui i te maitai i te mau parau no te paari; a imi i te ite na roto i te haapii-maitai-raa e na roto hoi i te faaroo. B. F. 88:118.

Ua faaauhia tatou i roto i teie nei ao i roa mai ia tatou te ite i te mau mea atoa. E tiaaaraa ta tatou no ô mai i te Metua, e ia oti teie oraraa e farii tatou i te utu'a maitai, e a ore râ, i te utu'a ino, mai te au i to tatou haapaaraa i taua tiaaaraa nei. E nafea tatou i te haapao maitai i te reira, matori râ ia imi tatou i te ite i te mau parau mau atoa.

E faaitoito hua i te apiti atoa to outou faaroo i te mata'u ore; te mata'u ore hoi, i te ite. II Petero 1:5.

TE SOTAIETE VAHINE TAUTURU

No te Ava'e TIURAI

Irava tamau aau: Alama 34: 27

Oia ia, ia ore outou ia tiaoro atu i te Fatu, ia i to outou aau i te pure tuu-
tuu ore ia'na ia maitai outou, e ia maitai atoa ratou tei pihaiho ia outou.

Mahana Maha (Matamua)

Mahana iritiraa mana'o e te himene na te mau tuahine.

Parau tumu no na Tuahine hahae: Te Pure.

Te titauhia nei ia tai'o maitai na Tuahine hahae i te pa-
rau i roto i te Alama 34:19-29 e ia faaitoito atu raua i te mau
taata atoa ia tamau i te pure i te mau taime atoa.

Mahana Maha (Piti)

Te Arii ra o MOSIA

E Tamaiti Mosia na te arii ra o Beniamina. Mosia 1:1-2.

To Mosia faariroraahia ei arii. Mosia 1:9, 10; 6:4-7.

Ua opani Mosia i te hamani-ino-raa e ua faaue oia ia vai
te aifaito i rotopu i te mau taata atoa. Mosia 27:1-7.

Ua faatia o Mosia ia haere ta'na mau tamarii e poro i te
evanelia i rotopu i te mau ati Lamana. Mosia 28:5-9.

Mahana Maha (Toru)

E arii paari mau â o Mosia o tei hinaaro noa i te hau. Mo-
sia 29:10-15, 32-41.

Te poheraa o Mosia, te arii hopea o te ati Nephi. Mosia
29:46, 47.

Te mau ture i faatiahia e Mosia. Alama 1:1.

Mahana Maha (Hopea)

Mahana raveraa ohipa na te mau tuahine.

TE HAAPIIRAA SABATI

No te Ava'e TIURAI

PUPU PARAIMERE

Irava tamau aau: *II Samuela 1:16*

Na to oe iho vaha i faaino ia oe, ei nia ia oe iho to oe na toto.

Tiurai 7. Te mau mahana hopea no Saula. I Samuela 30; 31.

Tiurai 14. To Davida otoraa ia Saula. 11 Samuela 1.

Tiurai 21. Ua riro te tamaiti tia i mamoe ei arii. II Samuela 2.

Tiurai 28. Hi'opoaraa.

PUPU PITI

Irava tamau aau: *Ruta 1:16*

Te vahi ta oe e haere ra, e haere atoa ia vau; e te vahi ta oe e parahi ra, e parahi atoa ia vau; to oe ra nunaa, o to'u atoa ia nunaa; e to oe ra Atua, o to'u atoa ia Atua.

Tiurai 7. Iosua i Kanaana. Iosua 5:10 e tae noa'tu i te 7:26.

Tiurai 14. Gideon te aratai o te mātā'u ore. Te Mau Tavana 6; 7.

Tiurai 21. Ruta e to'na here rahi. Ruta 1 e tae noa'tu i te 4.

Tiurai 28. Hi'opoaraa.

PUPU TORU e te MAHA

Irava tamau aau: *Genese 32:28*

Ua na ô maira oia, Teie oe aore a parauhia o Iakoba, O Iseraela râ, mai te arii ra hoi oe i te manaraa i te Atua ra, e e mana atoa oe i te taata nei.

Tiurai 7. Iakoba i ô Labana ma i Harana. Genese 29; 30.

Tiurai 14. To'na revaraa e te farerei-faahou-raa ia Labana. Genese 31.

Tiurai 21. Te farerei-faahou-raa o Iakoba raua Esau. Genese 32; 33.

Tiurai 28. Hi'opoaraa.

TE FEIA API



No te Ava'e TIURAI

Irava tamau aau: *Ioane 14:2*

E rave rahi te parahiraa mau i te fare o tau Metua ra; ahiri aita ra, ua parau atu ia vau ia outou. Te haere nei au e haamaitai i te hoê vahi no outou.

Tiurai 7. TE TAE-FAAHOU-RAA O IESU I IERUSALEMA E I GALILEA. *Ioane 5, 8, 9, 10:1-21.*

Tiurai 14. TA TE FATU OHIPA I PEREA E I IUDEA. *Ioane 4:42; Luka 9:51-62; 10:1-42; 12; 13; Mataio 18:1-5, 21, 22; 19:16.*

Tiurai 21. TE TAHI ATU Â MAU OHIPA I PEREA E I IUDEA. *Luka 14-18; Mataio 19:3-30; 20:1-16; Mareko 10:2-36.*

Tiurai 28. TE TAU TOETOE HOPEA. *Ioane 9, 10:22-42; 11, 12:9-11, 17.*

TE HAAPIIRAA PARAIMERE

No te Ava'e TIURAI

Irava tamau aau: *Hebera 11:6*

O te haamori i te Atua ra, e faaroo oia e, e Atua, e tia'i, e o oia te faatua i te feia i imi papu ia'na.

MAHANA MAHA (MATAMUA)

Te Hanahana e te Tahitohito

I te hoê mahana, uâ ihora te hoê Asini maamaa e te teoteo, i mua i te hoê Liona e haamomo atura ia'na i te hoê huru etaeta e te teoteo hoi. Haamata ihora te Liona i te riri i te reira huru teoteo i mua i te arii o te mau animala, e haamata ihora i te faatetei mai i to'na niho e te tairiiri i to'na aero, mai te mea ra e, ua ineine oia i te ou'a i nia i te Asini.

I muri a'e i na minute hoê e a ore râ e piti, haere atura oia.

Parau atura oia, "Tei ia oe, mai te mea ua hinaaro oe i te haamomo ia'u, tei ia oe—eita te reira e haapeapea ia'u e hoê iti a'e. No to'u puai e to'u hanahana e tia ia'u ia ata i te taa

ta mai ia oe, noa'tu i te mea ta oe e rave. Area râ, e Asini e, a faaroo mai na, no to oe iti e to oe atea i to'u feruriraa, no reira aita vau i haapeapea noa'tu ia'u no te taparahi ia oe.

E mea tia roa ia tatou ia ore roa ia haapao i te mau parau ino e te faaino a te mau taata nevaneva, mai te mea ua ite tatou e, eita te reira e faatupu i to tatou iho peapea.

MAHANA MAHA (PITI)

Te Puaaniho e te Vine

A auauhia'i te hoê puaaniho pae e te mau feia auau puaa oviri, horo atura oia i roto i te hoê ô vine e tapuni atura i raro a'e i te hoê tumu vine pupuru maitai.

Haere maira te mau feia auau puaa, imi ihora ia'na e aita i itehia, e haere ana'e atura ratou. Te Puaaniho râ, i to'na iteraa e ua atea ratou, haere maira i rapae e haamata atura i te amu i te mau rau e faaino atura i taua tumu vine ra.

Te mau feia auau puaa ra, tei ore i atea roa, faaroo a'era ratou i te ahehe rau raau e te hautiutiraa o te mau amaa, ho'i faahou maira no te imi faahou, e aita i maoro, itehia a'era taua Puaaniho pae ra e haru ihora ratou ia'na—te hoê utu'a te ore e tia ia'na ia parau e, e mea hape. No te mea na'na iho i faatae mai i te ati i nia ia'na na roto i te hama-ni-ino-raa i tei paruru ia'na ra.

MAHANA MAHA (TORU)

Ta Afereti Fafauraa

I te toparaa mahana o te tahi mahana aita â o Afereti i tae mai, e ua haamata to'na mama i te peapea, no te mea ua hinaaro iho â oia ia tae oioi mai oia i te fare. Tae maira te hoê taata tupu ma te parau e, ua ite au i te tahi mau tamarii i te haereraa i te anavai no te hopu i te pape, peneia'e tei roto atoa o Afereti ia ratou.

Pahona maira to'na mama, "Aita. No te mea ua fafau mai oia ia'u e, eita roa oia e haere i reira, maori râ ia faatia vau ia'na, e aita â oia i faahuru ê i ta'na fafauraa."

Area râ, tae maira te hora hitu, e i muri iho, te hora vau, e te tia noa ra te mama ia Afereti; e ua tae roa i te hora vau

e te afa hou oia i faaroo ai i ta'na tuo e te hio, e i reira horo atura oia i te uputa aua.

I reira parau atura te taata tupu, "A fa'i na i teie nei, ua haere atoa oe i te anavai e te tahi mau tamarii ra."

Eaha te huru o te anaana o te mata o taua tamaiti ra i te reira taine, e te toto i te haereraa i to'na ra paparia.

"Aita, e teie nei taata; ua fafau vau i to'u metua vahine e, eita vau e haere i reira maori râ ia faatia oia ia'u. Te mana'o nei paha oe e parau vau i te hoê parau haavare i teie nei. Ua tauturu vau ia lakobo i te imiraa i ta'na puaatoro ufa tei moe i roto i te uru raau. Aita râ vau i mana'o e, e maoro vau mai teie te huru."


MAHANA MAHA (HOPEA)

UA MOE IA'NA TE HI'O I NIA

I te hoê po te haere ra te hoê taata no te eiâ i te tô papaa i roto i ta te tahi atu taata faaapu. Ua rave oia i ta'na tamahine iti ei hoa no'na, no te tia i nia i te aua mai te mea e taata te haere mai. E mai te mea e taata te haere mai, ua'na ia e faaara'tu. Ou'a atura taua taata ra na nia i te aua ma te pute rahi i roto i to'na rima, e na mua a'e i to'na raveraa i te tô papaa, hi'o atura oia i te mau vahi e ati noa'e i te tahi pae na mua e i te tahi pae i muri iho, e no to'na iteraa e, aita e taata, ua haamata oia i te rave i te tô. Area, te tamahine iti ra o tei haamana'o atu i to tatou Metua i te ao ra, parau atura oia:

"Te vai nei te hoê vahi aita â oe i hi'o!" Hitimahutabiahura te papa e mana'o ihora oia e, e taata te haere maira. Fariu maira oia ma te parau, "Eaha te auraa o ta oe parau?" Pahono atura te tamahine, "Eaha, ua moe ia oe i te hi'o i nia?"

Tufetu atura to'na papa i ta'na pute, ou'a faahou atura na nia i te aua, rave ihora i te rima o ta'na tamahine e haere oioi atura i te fare.



Ia Haapao Vau I Ta Tau Metua E Tia'i

TUPU atura taua tamaiti ra e itoito atura te aau; i a'era hoi i te paari, e te vai ra te maitai o te Atua i nia ia'na.

E faaite-papu-raa teie i te tupu-mau-raa o te Tamaiti hau a'e i te mau tamarii atoa.

Ua tae mai te Tamaiti, o Iesu, i rotopu i te mau taata o teie nei ao ia farerei oia i ta te mau taata atoa e farerei i to raton faaearaa i te ao tahuti nei. Ua fanauhia oia i te ao nei ei ai'u mai te tahi mau ai'u i te huru, e ua riro to'na apîraa mai to te tahi mau tamarii. Ua mo'e te mau mea o to'na parahiraa i te pae varua ia'na ra, mai ia tatou nei te huru. Ua tupu teie tamaiti, vitiviti ihora oia i te faarahiraa i to'na ite e to'na paari atoa hoi. Ua tupu oia mai te maitai i te maitai roa, eiaha râ mai te ino i te maitai.

Mai te au i to tatou ite i te mau peu o te ati Iuda i ravehia i te tau o Iesu, e mea papu e, ua haapii-maitai-roa hia ia oia i te ture e i te mau parau mo'a ra. No te mea ua na reirahia iho â te mau tamarii tamaroa ra, e ua tamau-noahia to Iesu ite na roto i te ohipa, e te pure, e te feruri-maitairaa. Ua haapii-atoa-hia oia i te ohipa tamuta i to'na apîraa ia rave maitai oia i te ohipa o tana toroa ra. Aita hoi Oia i tapeahia e te hara, ua here roa râ Oia i te parau mau, haapao ihora Oia i te reira, no reira Oia i tiamâ'i.

E na taata faaroo o Iosepha raua o Maria, e ua haapao maitai raua i te ture. Ua haere raua i te mau matahiti atoa i te oro'a ra i te Pasa, te hoê tamaaraa mo'a tei tamauhia e te ati Iuda ei haamana'oraa ia i te rima tauturu o te Atua, o tei tuuhia mai i nia iho i te mau tamarii a Iseraela i te taime o to Iseraela faaoraraahia mai, mai Aiphiti mai. Ia haere to ratou mau tane i mua i te aro o te Fatu no teie oro'a e tia'i.

I to Iesu taeraa i te ahuru ma piti o to'na matahiti, ua afai-atoa-hia oia i te Pasa e to'na nau metua ra.

I te ahuru ma piti o to ratou matahiti ua riro ihora te mau tamarii ati Iuda ei melo no to ratou iho mau oire, e ia tae i te Pasa, ia farii-maitai-hia ratou e te mau Tabu'a, ua riro ia ratou *Ei Tamaiti o te Ture*. Ua hinaaro iho â te mau metua ia tae ta ratou mau tamaroa i reira e i te hiero, ia itehia ratou i roto i te amuiraa e maitai ai. Mai te reira hoi Iesu i to'na haereraa i reira.

E hitu mahana teie Pasa i te maororaa e ua rahi roa te ati

Iuda tei putuputu mai i teie oro'a Pasa. Ua haere mai te mau taata no te mau vahi atoa. E ua amuihia ratou i roto i to ratou haereraa i roto i te mau pūpū e ua riro to ratou mau pūpū ei paruru no ratou i te mau taata eiā e te mau taata ha haru tei faaea tamau i pihaiiho i te mau purumu ra. Ua tere ihora Iosepha e to'na utuafare i roto i te tahi pūpū mai teie te huru i te Pasa.

I te faaotiraa o teie Pasa, ua haere atura te pūpū Galilea ia ho'i atu i to ratou iho fenua ra. Ua tere ratou no te ho'e mahana i te atea na mua a'e i to Iosepha raua o Maria iteraa e, aita o Iesu i pihaiiho ia raua i roto i tana pūpū ra. Ua pea pea ihora raua, haamata a'era raua i te ho'i mai i Ierusalem ma no te imiraa i ta raua tamaiti. E toru mahana i pau i to raua imiraa ia Iesu. *Ite atura raua ia'na i roto i te hiero ra, te parahi ra i rotopu i te mau orometua, te faaroo atura e te ui atura ia ratou.* E ere anei i te mea maere, ia uihia te ho'e tamaiti, ho'e ahuru ma piti matahiti to'na, e te mau orometua, e a ore râ, ia faatiahia oia ia ui atu i te mau orometua i te mau mea ta'na i farerei? Ua riro teie mau amuiraa ei haapiiraa mau no te mau tamaroa. Ua putuputu iho â te feia apî e te feia paari i reira ia faaroo e ia ani atu i teie mau orometua paari. E mea maere râ teie putuputuraa, no te mea, ua faaite maira te mau orometua paari e, *Aita â ratou i teie te ho'e tamaiti mai teie te huru. Maere ana'e ihora te feia atoa i faaroo ia'na ra, i to'na ite e ta'na parau.* Te faaite pūpū mai nei teie ia tatou e, ua haapii maitai e ua haapao maitai teie tamaiti, o Iesu, i to'na taime i to'na apîraa. Ua roma te ite rahi roa i teie tamaiti.

Ua maere Maria e to'na hoa i to raua iteraa i ta raua iho tamaiti i rotopu i taua mau taata ite ra. Parau ihora Maria mai te maru: *E tau tamaiti, eaha oe i na reira mai ai i maua? Inaha i imi noa na maua o to metua tane ia oe ma te o to.* Ua maere ihora raua i ta Iesu pahonoraa, no te mea, e faaiteraa teie i to'na paari. Ua parau maira oia ia raua, *Eaha orua i imi ai ia'u? aita orua i ite, e ia haapao vau i ta to metua e tia'i?* E ere teie i te faahaparaa i to'na ra metua vahine, e haamana'oraa râ ia Maria no te ho'e mea tei moe i to'na, oia hoi, o vai to Iesu Metua mau? I parau na hoi Maria i te parau e—*Maua o to Metua tane.*

Papaikia e Viri H. Miller

Aita te Hoê tei Hau atu ia Ioane Bapetizo

E ORE roa e itehia te ohipa tei hau roa'tu i te ohipa mo'a tei ravehia e Ioane Bapetizo, mai tei faaite-hua-hia mai ia tatou na roto i ta Iesu iho mau parau: *E parau mau ta'u e parau atu ia outou nei, i ta te vahine i fanau nei aita'tu ia peropheta rahi i itea ia Ioane Bapetizo nei, o tei iti roa râ i te basileia o te ao ra, e rahi ia ia'na. Mai te iterua mai o Ioane Bapetizo ra, e tae roa a'enei i teie nei, te mârôhia nei te basileia o te ao ra, e te titau nei te feia mârô ia noaa i te haru. O te mau peropheta atoa e te ture tei haapii ia outou e tae roa a'enei ia Ioane nei. E Ia Tia Ia Outou I Te Farii Mai, O Elia teie i parauhia ra e e tae mai. E tari'a to'na ei faaroora ra, e faaroo oia. Mataio 11:11-15.*

E ere ia no te ohipa maere ta'na i rave, e a ore râ te semeio ta'na i faatupu, no te mea e, e ere i te peu na'na ia rave i i taua mau huru mea ra. Ua tiaturihia râ oia ia faaoti i te ohipa rahi no te faaineineraa i te e'a na mua i te Fatu, ia Iesu Mesia. Ua bapetizo hoi Ioane ia Iesu, e e tia ia ia feruri tatou e—O vai ia tei tiaturihia no te raveraa i te ohipa mai te reira na mua i to'na tau e a ore râ mai te reira tau mai â? Na vai e farii faahou i te tura rahi e te hanahana no te bapetizoraa i te Mesia?—e ua riro atoa oia i te taata ite i te pouraa mai o te Varua Maitai i nia iho i to Iesu upoo i roto i te tapao o te uupa ra.

I taua tau ra, o Ioane ana'e ia o tei tapea noa i te mau taviri e te mana mau i nia i te ao nei. Ua farii atura oia i taua mana ra no te ati Iuda. O Zakaria, o te metua tane ia o Ioane tei faatahinu ia'na. No reira oia i farii ai i te mana e te mau taviri no ta'na ohipa arai. E ua ite mau oia i te tae-mau-raa o te hoê Faaora, oia hoi, mai tei haapapuhia na roto i ta'na aniraa ia Iesu: *E ite a'era Ioane i roto i te tapearaa ra i te mau ravea a te Mesia ra ua tono maira oia i e toopiti pue pipi a'na ra, o tei ui mai ia'na e, O oe anei te tae mai, e e tia i atu anei tatou i te tahi ê? Mataio 11:2, 3.*

O tei iti roa râ i te basileia o te ao ra e rahi roa ia ta'na—

no te mea eita e neheuehe ia faaorahia te taata i roto i te ite-ore-raa. E e peropheta mau Ioane Bapetizo i rotopu i te mau peropheta atoa a te Atua, te tumu no te îraa o te parau mau—eaha ia te rahiraa o ta'na tufaa? E i te mau taima atoa a feruri ai tatou i te mau ohipa a te Mesia e to muri iho ia'na i te aratairaa i ta'na mau ohipa i nia i te ao nei, e tia ia ia feruri atoa tatou i te mea e, na Ioane Bapetizo i faaineine i te e'a i mua ia ratou.

Papaihia e Horate G. Wilde

PARAU API NO TE MISIONI

I te ava'e no Me i mairi a'enei ua fariihia te parau api, no te mau amaa i reira i faaterehia i te Amuiraa Eperera, tei faaite mai i te huru o te ohipa tei ravehia. Ua mauruuru roa te mau taata atoa o tei tae i te mau amuiraa tei faaterehia i Vahitahi, Hikueru, Nihiru, Takaroa, Raraka, Papeete, Tubuai, Aratika, Apataki, Marokau e i Fakarava.

Ua mauruuru tatou atoa no to outou itoitoe i te haereraa i te mau amuiraa. A faaitoitoe â e a faaineine maitai ia outou iho no te Amuiraa Atopa i mua nei.

Takaroa, 3 no Me, 1940

Na te Peresideni Setefano, ia maitai oe e to utuafare atoa i te mau haamaitairaa a te Fatu, amene.

Te faatae atu nei au ia oe i teie mau parau ia tuuhia i roto i te Heheuraa Api, no te mau ohipa i ravehia i te amaa i Takaroa nei i te ava'e Eperera i mairi a'enei. Te ohipa ori tei faatiahia i Takaroa nei:

II Nephi 2:25: *Ua hi'a Adamu ia vai te mau taata, e te vai nei te mau taata ia noaa to ratou oaoa.* Noa'tu te huru o te taata e a ore râ ta'na ohipa, te hinaaro nei cia i te oaoa. Te rave nei te mau taata i te ohipa no te Evanelia no te mea te noaa nei te oaoa ia ratou no taua huru ohipa ra.

I te ava'e Mati i mairi a'enei ua tae mai i Takaroa nei na orometua ra o Nile e Ri, ua haamata raua i te hoê ohipa api na te feia api, oia hoi, ua haapii raua ia matou i te tahi mau ohipa no te feia api. Ua ite matou e rave rahi i te oaoa tei tupu noa nei i roto ia matou no te mau oriraa maitai e te neheuehe hoi, e no to matou oaoa rahi no teie ohipa api. Ua patu matou i te hoê tahua oriraa i te area i ropu i te fare pureraa e te fare putuputuraa. Teie ia te rahi o taua tahua ra, 15 metera i te roa, e 11 metera i te aano. I te pô monire, i te 8 no Eperera, ua taahihia i nia iho i taua tahua ra, e ua hime-nehia, e ua faaotihia te tahi pureraa, e ua topahia te i'oa o taua tahua ra *Nile Ri*.

Ua faaite mai te Tavana Mataeinaa i to'na mauruuru i te ohipa maitai tei tupu i nia iho i to'na mataeinaa i Takaroa nei. I muri mai ua ori matou i te mau ori tei haapiihia mai ia matou e ua maiti ihora matou i te Arii Vahine i roto i ta matou oriraa, e i reira to matou iteraa e, ua taa e roa te mau oriraa tei orihia e matou i te matamua ra i te mau matahiti i mairi a'enei, tu-

pu ihora te mana'o i roto ia matou ia haapii maitai matou i te mau ori maitatai e te nehenehe hoi. Ua haapihia na oriraa nehenehe e hitu, e ua tamau-maitai-hia.

E hoa ino ma e, ua riro te mau ohipa maitai ei haamaitairaa i te Atua. A tai'o na i te Salamo 150:1-6, ua riro hoi teie mau irava ei faaiteraa i te mau mea e au i te Atua.

Papaihia e Turoa â Turoa

PARAU API ORC'A

BAPETIZORAA

I'O A	MAT.	MAH. BAP.	FENUA	NA VAI I BAPETIZO
Kunakuna â Tekehu	12	3-3-40	Hao	Rui Randall
Temaruata â Teveu	8	3-3-40	Hao	Rui Randall
Herako-Mere â Tokoroa	9	3-3-40	Hao	Rui Randall
Terii â Teheura	26	17-3-40	Papeete	Rutena Allred
Teamo â Tetohu	11	6-4-40	Raraka	Yale Peterson
Hivaura â Tanetupuhoe	8	6-4-40	Marokau	Matavai â Pahoa
Temate â Tupava	9	7-4-40	Takaroa	Tekehu â Tetoka

FAATORO'ARAA

I'O A	TORO'A	MAH. FAAT.	AMAA	NA VAI I FAATORO'A
Teaitu â Huri	Diakono	6-4-40	Taega	Melavina Christensen
Marau â Tapaea	Diakono	6-4-40	Nihiru	Tere Braegger
Tehei a Parii	Diakono	7-4-40	Takaroa	Taumata â Mapuhi
Maehaga Vairau â Toae	Diakono	7-4-40	Takaroa	Nile Chugg
Tahuka â Mariteragi	Diakono	7-4-40	Vahitahi	Rui Randall
Teuaura â Taiarui	Tahu'a	21-4-40	Papeete	Ioane Richards

TE MAU PARAU API

PARAU FAAITE

Na roto i to matou opaniraahia e te Hau ia nenei faahou i te mau parau api no te tama'i, te parau atu nei matou i te mau taata atoa o te hinaaro i te tai'o atu i te reira, ia hoo ta matahiti ratou i te Ve'a Maohi tei neneihia i te fare neneiraa ve'a a te Hau.

Ei patoiraa i te mana'o o te mau taata atoa, na itehia e, aita te luko e anau e e taparahi i te taata, e eita atoa ratou e tapūpū no te haereraa e imi i te maa, maori rā, ia haere te mau fanaua na muri i te mau metua i roto i na matahiti matamua ra.

Te vai nei te hoê tuturahunui te marei i ta'na maa mai te mareiraa i te puaatoro. No te raveraa i te reira ohipa, e faatautau taua tuturahunui ra ia'na iho i nia i te hoê amaa raau nainai, e i reira oia e faanehenehe ai i ta'na taura mareiraa poto tei haapiripiri-roa-hia te hopea, e e taora oia i te reira i nia i te ra'o te haere noa'tu na pihaiho ia'na ma te hahi ore, e i reira oia e ume ai i te reira e a amu atu ai.

Ua itehia i teie nei te tahi mau manumanu rii, mai te popoti te huru, tei tae to ratou faito mai to te mau manu rii nei, oia hoi, hoê ahuru ma vanu centimetera i te roa e e hitu centimetera i te aano.

Ua itehia a'enei e, no te hoê afa kilo maa te oti i te hoê raau tupu, e pa'u i taua raau ra e hoê hanere e e pae ahuru litera pape i te haapau-roa-hia i roto i te reva.

Ua ite tatou atoa e, te amu nei te mau i'a i te mau rimu i roto i te pape e i te miti atoa hoi. I teie nei râ, ua itehia e, te vai nei te hoê huru rimu o te amu atoa i te i'a.

Te vai nei te hoê huru i'a o te tuu i to ratou mau huero i roto i to ratou mau vaha e tae noa'tu i te pataraa o te reira, no reira e faaea ratou ma te maa ore i na hebedoma e toru, oia hoi, te tau e pata'i te huero. E i muri a'e i te reira e riro taua mau vaha ra ei vahi tapuniraa no taua mau fanaua i'a ra ia tupu noa'tu te peapea.

Ua mana'ohia e, e oti te hamani, i te auro atoa tei herubia mai, mai te matahiti 1492, i muri a'e i te Mesia, e tae roa mai i teie nei, te hoê vahi auro tuea o te tae i te faito ra e hoê ahuru ma piti metera e te afa i te mau hiti atoa ra. E ia tai'ohia te hoo o te auro i teie nei, tera mai ia te faufaa o taua vahi auro, oia hoi, 1.848.000.000.000 farane, moni farani.

No te mau pô toetoe roa te ravehia nei, i teie nei, te mau paraitete rai-rai tei horoa mai i te mahanahana mau tei hinaarohia. Ua noaa te reira mahanahana na roto i te tahi mau niuniu tei tuuhia na roto i te reira, e na te uira e tamahanahana i te reira, e e tia roa ia faatano-maitai-hia te mahanahana e te taata te rave i te reira.

Ua iteahia a'enei, e te tahi mau taata paari, e riro te alfalfa, oia hoi te hoê matie te horoahia nei ei maa na te mau animala, ei maa maitai e te au roa hoi na te taata nei, no te mea te vai atoa ra i roto i te reira matie te mau mea maitai no te parururaa i te hoê ma'i tei parauhia e Scorbut.

Marcel Bonnet, Gérant
Kenneth R. Stevens, Imprimeur

O. Rudeen Allred, Éditeur de la Mission
Ralph J. Richards, Assistant Éditeur

Neneihia e te MISIONI TAHITI no te Ekalesia a Iesu Mesia i te Feia Mo'a i te Mau Mahana Hopea Nei. Orovini, Papeete, Tahiti.

Te hoo: 5 farane i te matahiti; e 10 farane no na matahiti e toru.